


ԼՈՒԻ-ԲԵՐԴԻ ՌԻՇ ԲՐՈՆԶԵԳԱՐՅԱՆ ՄԱՐՏԱԿԱՌՔԸ

Ս. Հ. ԳԵՎԵՋՅԱՆ

Մտեփանավանից 3 կմ հյուսիս-արևելք, Չորագետի ձախ ափին, ալժմ-
յան Լոուի-բերդ գյուղի զեղատեսիլ սարահարթում սփռված են բրոնզեդարյան
և վաղ երկաթի մշակույթի հարուստ դամբարաններ, որոնք երբեմն ստոր-
գետնյա փոքրիկ սրահների ձև ունեն, քարաշար պատերով ու սալածածկերով:
1971 թ. ամռանը, այստեղ կատարված պեղումների շնորհիվ, բացվեց մի մեծ
դամբարանասրահ (№ 7)՝ 8 մ երկարությամբ, 2,5 մ լայնությամբ և 2,8 մ
խորությամբ: Մա ուղիղ շարված պատերով թաղման մի սրահ էր, հատակը
հիմնահողից. դամբարանն առանց ակնառու արտաքին նշանների էր՝ գետնի
մակերևույթից հագիվ 10 սմ բարձրության մի թումբ (նկ. 1): Պեղման առա-
ջին իսկ օրերին պարզ դարձավ, որ դամբարանը կողոպտված էր, քանի որ
բացակայում էին ծածկի հսկա սալաքարերը: Նրանց բեկորներից մի քանիսն
ընկած էին հատակին և իրենց տակ պահպանել էին շատ արժեքավոր հնագի-
տական իրեր: Դամբարանի մասամբ վերականգնված խեցեղեն անոթները
սյաշտամունքային նշանակություն ունեին: Սրանք բարձր, սնամեջ, զարդարուն
«բուրանոթներ» էին, ընկույզի կեսի ձևով քրեղաններ, կճուճներ՝ զարդարված
և ընդելուզված: Այսպիսի խեցեղեն հայտնի է Հայաստանի ու բրոնզեդարյան
մի քանի հարուստ դամբարաններից, այդ թվում նաև Լճաշենից: Իսկ բրոնզե
իրերը ներկայացված էին տարբեր տեսակի բոժոժներով, թռչունների արձա-
նիկներով, ճ՝ տառի ձև ունեցող իրերով, արծաթապատ և զարդարուն կոճակ-
ներով, լայնաշեղք դաշույնով, կաթսայով, ուլունքներով, զարդերով, բրոնզե
ժապավեններով, կահույքի մասերով և այլն: Ուլունքների և այլ զարդերի մեջ
երևում էին կարմիր օխրայի մնացորդներ, որով սովորաբար «ներկում» էին
ննջեցյալներին: Դամբարանի հարավ-արևելյան նեղ պատի երկու անկյուննե-
րում հայտնաբերվեցին ձիերի գլուխներ ու վերջավորություններ: Դամբարանի
արևելյան կողմում, ցաքուցրիվ պահպանվել էին գլանաձև փայտերի մնա-
ցորդներ, որոնք շրջանակված էին բրոնզե ժապավենաձև թիթեղներով: Այդ-
պիսի փայտերի բեկորներ պահպանվել էին նաև թռչունների և ճ-աձև օղակ-
ների քանդակների, սեպաձև հիմքերի վրա: Պարզ երևում է, որ Լոուի-բերդի
բրոնզեդարյան այս ննջեցյալը նշանավոր անձնավորություն է եղել, քանի որ
դամբարան է իջեցվել իր մարտակառքով ու ձիերով և այստեղ հայտնաբեր-
ված փայտի մնացորդները, բրոնզե ժապավենները, ճ-աձև առարկաները,
թռչունների զանգակ արձանիկները և բազում այլ առարկաներ զարդարել են
փայտե շքեղ մարտակառքը: Բոժոժ-զանգուլակները, բրոնզե մեծ կոճակները
և մի շարք այլ առարկաներ էլ պատկանելիս են եղել ձիազարդի կոմպլեկտին:
Ինչպես երևում է, շատ շքեղ ու բազմաթիվ են եղել ննջեցյալի անձնական իրե-
րը, սակայն հազվագյուտ մետաղներից պատրաստված բարձրարվեստ առար-
կաները կողոպտվել են հնադարյան գանձախույզների կողմից և նրանց քա-

նաև ու տիպերն այժմ անհնար է վերականգնել: № 7 դամբարանի վաղեմի հարստության ու շքեղության մասին այժմ կարելի է դատել լճաշենի ցեղային առաջնորդների դամբարանների պեղումների տվյալներով, դամբարաններ, որոնք թե՛ իրենց արտաքին ու ներքին ձևավորմամբ, թե՛ պահպանված իրերի տեսակներով, տիպերով, քանակով, ժամանակագրությամբ, թե՛ թաղման ծեսով ու արարողությամբ միտնդամայն համապատասխանում են Լոռի-բերդի XIV—XIII դդ. նկարագրվող դամբարանին:



նկ. 1

Ակնհայտ է, որ վերը նշված դամբարանների այս ձևերն ու թաղման արարողություններն սկիզբ են առել Արևելյան Հայաստանի տարածքն զբաղեցնող ցեղերի միջավայրում, տակավին մ. թ. ա. III հազարամյակում, զարգանալով փոփոխվել են ամբողջ երկրորդ հազարամյակի ընթացքում և ներկայացնում են տեղական հիմքի վրա աճած երևույթներ:

Նման թաղումներով հայտնի են Թրիալեթի² և Դմանխի միջին բրոնզեդարյան դամբարանները, Կիրովականի նշանավոր դամբարանաթումբը³, որտեղ, թեև դիակառքը չէր պահպանվել, սակայն դամբարանի ծավալը, իրերի դասավորությունը, եզների դանգերի ու վերջավորությունների առկայությունը և կենտրոնական մասի վրա նկատվող հետքերը վկայում են այդ մասին: Նման թաղում պետք է ունենար նաև Լոռի-բերդի № 6 միջին բրոնզեդարյան քարակղաչին կողոպտված դամբարանը, որն իր չափերով, ձևերի զանգերի նմանօրինակ դասավորությամբ, դամբարանային նյութերի կրկնությամբ դասվում է վերոհիշյալների շարքը:

¹ Նշված տիպի դամբարանային հուշարձանների թվագրությունը հաստատված է Հ. Ա. Մարտիրոսյանի կողմից, տե՛ս Армения в эпоху бронзы и раннего железа, Ереван, 1961, էջ 106:

² Б. А. Куфтин, Археологические раскопки в Триалети, I, Тбилиси, 1941, էջ 361—375, 451:

³ Б. Б. Пиотровский, Археология Закавказья, Ереван, 1949, էջ 46—47; А. А. Мартиросян, Армения в эпоху бронзы и раннего железа, էջ 64—66:

Շեշտը դնելով դամբարանային հուշարձանների և թաղման համապատասխան արարողությունների գուտ տեղական զարգացման վրա, ուսումնասիրողները միաժամանակ նշում են, որ այստեղ առկա է նաև խեթական մշակույթի ազդեցությունը⁴, մշակույթ, որի հետ Հայաստանը կապված էր բուլում տեսանելի և ժամանակի ընթացքում այժմ արդեն անտեսանելի առնչություններով: Ավելին, նշելով թաղման ձևերի խեթա-հայաստանյան աղերսները, Հ. Ա. Մարտիրոսյանը գտնում է, որ մ. թ. ա. II հազարամյակի թաղման շքեղ ծեսը ինչ-որ չափով կապվում է հայ հեթանոս թագավորների և Առաջավոր Ասիայում բնակվող սկյութական առաջնորդների թաղման արարողությունների հետ⁵: Այս ամենը օրինաչափ է այն իմաստով, որ նշված երկվույթները զարգանում էին աշխարհագրական, պատմական, էթնիկական ժամանակագրական հաջորդական կապի մեջ, Առաջավոր Ասիայի որոշակի մի հատվածում: Աստիճանական զարգացման առումով այժմ արդեն զարմանալի չէ այն հանգամանքը, որ թաղման շատ նման ձևեր ու արարողություններ նկատվում են նույնիսկ հունական աշխարհում: Դուրս այստեղ էլ դիտելի լինի խեթական աշխարհի ուժեղ ազդեցությունը: Բերենք մեկ օրինակ: Խոսքը մ. թ. ա. II հազարամյակի I կեսի միքենյան շախտային դամբարանների մասին է⁶, որոնք ուղղանկյունաձև քարարկղեր են, բացառիկ թանկարժեք գեղարվեստական իրերի պարունակությամբ: Սրանք ծածկված են սալերով, որոնք երբեմն կրում են մարտակառքի բարձրաքանդակներ և պարուրաձև այնպիսի պարդեր, ինչպիսիք կան լճաշենի և Ադիամանի սալերի վրա⁷: Ի դեպ, սրանք առաջին վկայություններն են ձիերով լծված մարտակառքերի, որոնք օգտագործվել են Հունաստանում (մ. թ. ա. XVI դար):

Ավելորդ չէ հիշատակել նաև մ. թ. ա. VIII դարի կեսով թվագրվող, Աթենքի Դիպոլիսյան գերեզմանոցում հայտնաբերված թաղման կարասները⁸, որոնք ամբողջովին զարդարված են գունազարդ պատկերներով և երկրաչափական նախշերով: Պատկերների թեման թաղման ու ողբի տեսարաններ են, որտեղ հանգուցյալը բարձր, ցանցահյուս հիմքով փայտե պատգարակի վրա է, ինչպես լճաշենի պատգարակները: Մի դեպքում այս պատգարակը, որի վրա հանգուցյալը պսոկած է, դրված է քառանկյլ սալին, որին լծված են զույգ ձիեր: Այս շարքը լցված է սվաստիկաների, արևի այլ նշանների, թռչունների, լայնաթիկունք և սակրաձև մարմիններ ունեցող մարդկանց պատկերներով՝ տեսարաններ, որոնք շատ հարազատ են մեր բրոնզեդարյան հուշարձաններին և թաղման ձևերին: Կարասների վրայի ոլորանախշերն իրենց տարբեր ձևերով

⁴ Б. А. Кувшин, *նշվ. աշխ.*, էջ 100; Б. Б. Пиотровский, *նշվ. աշխ.*, էջ 45; А. А. Мартиросян, *նշվ. աշխ.*, էջ 72—73:

⁵ А. А. Мартиросян, *Раскопки в Головино, Ереван, 1954*, էջ 110—111:

⁶ G. Perrot et Ch. Chipiez, *Histoire de l'art dans l'antiquité la Grece primitive, l'art mycénien*, t. VI, Paris, 1894, էջ 764, *նկ.* 359, էջ 763, *նկ.* 360, էջ 767, *նկ.* 362; Н. А. Сидорова, *Искусство Эгейского мира*, М., 1972, էջ 146—150:

⁷ А. О. Мнацаканян, *Древние повозки из курганов бронзового века на побережье оз. Севан*, СА, 1960, № 2, էջ 140, *նկ.* 2 և 3; *Ե. Հալաջյան, Դամբարանների պեղումները Խորհրդային Հայաստանում, Երևան, 1931*, էջ 194—197, *նկ.* 193—196:

⁸ Г. Чайд, *У истоков европейской цивилизации*, М., 1952, էջ 113:

⁹ «Искусство Древней Греции», М., 1971, *նկ.* 70 և 72:

նույնպես սիրված զարգաձևեր են մեր խեցեղեն ամանների համար և բնորոշ են նաև փուլուփական արվեստին:


Հայաստանի կապերն ու փոխառնչությունները խեթերի ու Կրետե-միքենյան աշխարհի հետ իհարկե չեն սահմանափակվում դամբարանային ձևերով ու թաղման արարողություններով: Ուսումնասիրողներն արդեն բազմիցս նշել են նյութական արտադրության բազում ոլորտներում զգացվող աղդեցությունների կամ ուղղակի տրանզիտի առկայությանը մ. թ. ա. II—I հազարամյակներում¹⁰: Այժմ Լոռի-բերդի վերը նկարագրած № 7 դամբարանի նյութերի հիման վրա կարելի է լրացուցիչ նոր դիտողություններ անել խեթա-հայաստանյան—Կրետե-միքենյան մշակութային առնչությունների մասին: Խնդիրն այն է, որ այս դամբարանի բրոնզե իրերի մեջ գտնվեց նաև մասամբ վնասված մարտակառքի մի մոդել, որն զգալի հետաքրքրություն է ներկայացնում այդ կապերի իմաստով:

Սույն հոդվածով մենք ներկայացնում ենք մարտակառքի այդ մոդելը իր մոտավոր համանմաններով և նախնական ուսումնասիրության ենթարկում այդպիսիները:

Մարտակառքն (նկ. 2) իր զույգ ձիերով կանգնած է քառանկյունի, փոքրինչ գողավոր, սնամեջ պատվանդանի վրա, որի կողային շորս պատերն ու հատակը եռանկյունաձև, իսկ վերին մակերեսը՝ երկարավուն բացւածքներ ունեն: Պատվանդանի մեջ բրոնզե երկու գնդիկներ կան, որոնք ժամանակին զանգակների դեր են կատարել: Պատվանդանն իր հերթին ամրացված է խարժախաձև վերջավորությամբ (մի ծայրը կոտրված է) զարդարուն ձողի վրա այնպես, որ կարող է պտտվել իր առանցքի շուրջը: Մոդելի ընդհանուր բարձրությունը, ձողի հետ միասին՝ 18 սմ է, իսկ մարտակառքի ընդհանուր երկարությունը՝ 14 սմ: Սա թեթև, փոքրիկ թափք ունի, որի վրա կանգնած են երկու մարտիկ: Թափքի առջևի մասը կազմված է կիսակլոր ձողից, որը հենվում է միջնամասի ուղղահայաց ցցի վրա: Թափքը ետևի կողմից բաց է, միայն կենտրոնական մասում բարձրանում է օղակաձև ավարտվող մի ձող: Թափքի առջևի կենտրոնական մասը ետևի ձողի հետ միանում է երկու փոքրիկ ձողիկների միջոցով, որոնք ամրացված են հատակին ու նրանից բարձր և կիսում են թափքը: Սնին, որը հետնամասում է, ավարտվում է վեց շրջանի անիվներով: Թափքի կենտրոնական մասում, ներքևից, բարձրանում է կոր առեղը, որի ծայրը ուղղահայաց է և ունի օղակ՝ սանձերի համար: Ձիերի ուսամասերում, առեղի երկու կողմերից անջատվող լուծը հենվում է ուղղակի նրանց բաշերի վրա: Լուծի ծայրերին նույնպիսի օղակներ են, ինչպես առեղի ծայրին, որտեղից սանձերը պիտի անցնեին: Այս օղակները երկճյուղ են, հայերեն ճ-ի ձևով և հիշեցնում են նույն դամբարանից հայտնաբերված ճ-աձև քանդակներն ու լճաշենի նմանօրինակ իրերը: Ձիերը նեղիրան են, երկարագանգ, կիսաբաց բերաններով, ցցված եռանկյունաձև ականջներով, շատ բարձր, կանգուն բաշերով, աչքերը արտահայտված են փոսիկներով, պոչերը

¹⁰ Б. А. Куфтин, *նշվ. աշխ.*, էջ 93: նույնի՝ Археологические раскопки 1947 г. в Цалкинском районе, Тбилиси, 1948, էջ 20—21; А. А. Мартirosyan, Армения в эпоху..., էջ 70—71; Г. Е. Арешян, Малоазийские формы в керамике Армении среднего бронзового века, СА, 1973, № 4, էջ 45—48: Այդ արտահայտվում է նաև Լոռի-բերդի միջին բրոնզեդարյան № 6 դամբարանի խեցեղենի վրա:

երկար: Մարտիկները կանգնած են թափքի երկու կողմերում, իրանով հենված նրա եզրերին, նրանց ոտքերը՝ ներքևի մասում միանալով, կազմում են մեկական ձող: Մարտիկներից մեկը կռացած է: Նրանք ունեն երկար վիղ-դեպի առաջ կռացածը բարձրակատար սաղավարտով է, մյուսը՝ գլխաբաց է և ուղիւ կեցվածքով: Դեմքերը տափակ են, երկարավուն, աչքերի տեղում փոսիկներ են, արտահայտված են բերանները և կորնթարդ քթերը: Յուրաքանչյուրի ձախ թևի տակ, գոտկատեղին, տեղավորված է դաշույն: Ձիերից առաջ, պատվանդանի կենտրոնական մասից դուրս եկող բարձրադիր ձողի վրա կանգնած է:



Նկ. 2

Նկ. 3

սլացքի մեջ գտնվող արու այծյամի փոքրիկ քանդակը, երկար դնչով, փոքրիկ պոչիկով և դույզ աղեղնաձև եղջյուրներով:

Համեմատելով մարտականքի այս մոդելը Հաշենում հայտնաբերվածների հետ, տեսնում ենք, որ սա հար և նման է 1957 թ. Հաշենում գտնվածին (ՊՊԹ, № 2009/442): Ծիշտ նույնպիսի կերտվածք ունեն սրա քառակյունի պատվանդանը, խարսխաձև ձողը, թափքը, առեղը, բարձրաբաշ ձիերն ու լուծի վրայի ճ-աձև օղակները (Նկ. 3): Այստեղ նույնպես ձախակողմյան զինվորը սաղավարտ չունի: Տարբերությունը միայն այն է, որ առջևի այծյամի փոխարեն այստեղ եղջերու է դրված: Նույնպիսի թափք ունի նաև Հաշենի 1956 թ. մոդելը (ՊՊԹ, № 2007/1), այն տարբերությամբ միայն, որ սա մի քիչ ավելի մեծ է և անիվներն ունեն 8—9 շյուղ: Հաշենի 1958 թ. երրորդ մոդելի (ՊՊԹ, № 2049/81) թափքը տարբերվում է ինչպես մեր օրինակից, այնպես էլ Հաշենի մյուս երկու օրինակներից նրանով, որ թափքի հատակը չանցած է, բացակայում են ետևի օղակաձև և մեջտեղի կիսող ձողերը: Վերջին երկու մոդելների առեղները հիմքից անմիջապես բարձրանում են, մեկը

կորագծով, մյուսը՝ անկյունավոր ձևով: Լոռի-բերդի առեղը իր բարձրագույն ուղղահայաց ծայրով նմանվում է ասորեստանյան առեղներին¹¹:

Մարտակառքի այս չորս օրինակների մեջ Լճաշենից երկուսի (ՊՊԹ, № 2009/442 և 2049/81) և Լոռի-բերդի մարտակառքի նույն կողմում կանգնած մարտիկները սաղավարտ չունեն: Թվում է, որ սա պատահականություն է, հավանաբար ձախակողմյան մարտիկի դործը մարտակառքը վարելն էր: Ինչպես մեր օրինակի, այնպես էլ Լճաշենի վերոհիշյալ երկու մոդելների լուծների վրա նկատվում են օղակներ, իսկ չորրորդի վրա (ՊՊԹ, № 2007/1) օղակների փոխարեն թուշունների քանդակներ են: Սրա պատմականը հարթ է, մարտիկները ոչ թե սանձն են ձգում, այլ ուղղահայաց կանգնած, ձեռքերը դրել են իրար ուսի, իսկ աղատ ձեռքերը բարձրացրել: Դիերի առջևում չկա արևի կենդանի, ինչպես մյուս մոդելներում¹², Ընդհանրապես, Լոռի-բերդի մոդելը, մյուսների համեմատ աչքի է ընկնում իր նրբություններով և թեթևությամբ: Եվս մեկ մարտակառքի փոքրիկ մոդել, առանց ձիերի, հայտնի է Պառավաբարի (մ. թ. ա. X—IX դդ.) պեղումներից¹³: Սրա թափքը փակ առաջամաս ունի, ետնամասը բաց է, անիվները 6 շուրջանի են, երկու մարտիկները հենված են առաջամասին, անվեն են, բայց ունեն մեկ կողմում սրածայր սաղավարտներ:

Երկրորդ նյութերի նկարագրությունից բխում են մի քանի օրինաչափ և մեկ համար կարևոր հետևություններ:

ա) Մ. թ. ա. XIV—XIII դդ. Հայաստանի ցեղային ավագանու դամբարաններում հայտնվում են մարտակառքերի բրոնզե մոդելներ, որոնք Արևելքի և Արևմուտքի հայտնի մոդելների մեջ մոտավոր դուրահեններ չունենալով, դիտվում են իբրև տեղական մետաղագործության արտադրանք:

բ) Նշված ժամանակաշրջանի մոդելները պատկանում են մարտակառքի մեկ հիմնական տիպի, որի փայտե իրական նմուշները հայտնի են դարձել և ուղտագործվել Հայաստանում շատ ավելի վաղ, քան հանդես են եկել նրանց մետաղե մանրակերտվածքները:

գ) Որոշակի տիպի մարտակառքերի արտադրությունը և օգտագործումը Հայաստանում միանգամայն օրինաչափ էր, քանի որ անիվավոր փոխադրամիջոցներն այստեղ երևան էին եկել մ. թ. ա. III հազարամյակում և անցել դարդացման երկար ճանապարհ: Շրջակա հին արևելյան երկրներում այդպիսիք հանդես էին եկել տակավին V հազարամյակի Հալաֆյան մշակույթի ոլորտներում¹⁴ և այնուհետև տարածվել Օբեիդ-շումերյան մարզերում մ. թ. ա. IV—III հազարամյակներում, որոնց ազդեցության տակ կարող էին ստեղծվել Հայաստանի լավագույն փոխադրամիջոցները¹⁵:

¹¹ R. D. Barnett, W. Forman, Assyrische Palastreliefs, Prague, № 20.


¹² Կարելի է ենթադրել, որ այս դեպքում մարտակառքի վրա կանգնած մարդիկ ոչ մարտի, և ոչ էլ որսի տեսարան են ներկայացնում, այլ՝ հանդիսավոր մի երթ: Այստեղ ճ-աձև զարդ-օղակները փոխարինված են թուշունների արձանիկներով՝ մարտակառքին ավելի շքեղ տեսք տալու համար. այդպիսիք գտնվել են նաև Լոռի-բերդի դամբարաններում:

¹³ С. А. Есаян, А. А. Мнацаканян, Находки новых бронзовых статуэток в Армении, СА, 1970, № 2, էջ 158, նկ. 1, 1.

¹⁴ Г. Чайлд, Древнейший Восток в свете новых раскопок, М., 1956, табл. XIX.

¹⁵ А. О. Мнацаканян, Раскопки курганов на побережье оз. Севан в 1956 г., СА, 1957, № 2, էջ 149, նկ. 8; նույնի՝ Древние повозки..., էջ 143, նկ. 7, էջ 142, նկ. 5:

Սակայն տվյալ դեպքում մեզ կարող են հետաքրքրել միայն մարտական տիպի արևելյան այն կառքերը, որոնք կարելի է դիտել իբրև մեր նմուշների գոնե հեռավոր ժամանակագրական նախատիպեր: Այդ տեսակետից ուշադրության արժանի է Հաֆաչայում (վաղ դինաստիական շրջան)¹⁶ գտնված գունազարդ կավամանի վրայի մարտականքը կամ դիակառքը: Սրա թափքը արկղաձև է, բարձր ու կամարաձև առաջամասով, որն ըստ երևույթին յուրօրինակ վահանի դեր է կատարել: Բարձրադիր առեղի վրա նստած է մի թռչուն, իսկ լծված երեք ձիերից երկուսը լուծ ունեն և կապված են սանձերի ու երախակալների միջոցով: Թափքի վրա կանգնած երկու մարտիկները հավանաբար դիմակավորված են, նրանցից մեկն ըստ երևույթին առաջնորդ է, թիկնեղ, բարձրահասակ, նեղ գոտկատեղով: Չնայած ժամանակի ու տարածության մեծ տարբերությանը, այս մարտականքի պատկերը շատ հարազատ է թվում մեր ըրոնդեղարյան արվեստին թե՛ մարտականքի, թե՛ ձիերի ու թռչունի, թե՛ լայ-



Նկ. 4



Նկ. 5

նաթիկունք ու դիմակավոր մարդկանց պատկերներով (նկ. 4):

Շումերյան մարտականքերի մի մասն ունի ոչ միայն բարձր առաջամաս, այլև աստիճանաձև, ցածր ետնամաս: Այդպիսիք են Թել-Ագրաբից գտնված պղնձե և Քիշից գտնված կավե մոդելները (III հազ. I կես)¹⁷: Իսկ Ուրից¹⁸ (վաղ դինաստիական շրջան) հայտնաբերված մի բարձրաքանդակի վրա տեսնում ենք բարձր առաջամասով ու առեղով և ավելի ցածր ետնամասով մի մարտականք: Նշված մարտականքերի անիվները բոլոր դեպքերում ծանր են, պատրաստված երեք զանգվածեղ տախտակներից: Հին Շումերում սրանք օգտագործվել են ոչ միայն որպես փոխադրամիջոց կամ մարտականք, այլև ուղեկցել են տերերին դեպի հանդերձյալ աշխարհ՝ որպես դիակառք:

Ուրի և Քիշի նշանավոր դամբարաններն են իջեցվել վերոհիշյալ տիպի մարտականքեր, ըստ որում, երբեմն երկուսը կամ երեքը միաժամանակ¹⁹ (ինչպես լճաշենում): Թաղման հնագույն այս սովորությունը ըստ երևույթին շումերներից տարածվել է ողջ Հին Աշխարհում: Նշված ընդհանրություններով

16 Г. Ч ай л д, Древнейший Восток..., էջ 231, նկ. 84:

17 J. C I. M a r g u e r o n, Mesopotamie, Genève—Paris—Munich, 1965, նկ. 43, Н. Д. Ф л и т т н е р, Культура и искусство Двуречья, М.—Л., 1958, էջ 115:

18 Г. Ч ай л д, նշվ. աշխ., աղ. XXIV а.

19 Նույն տեղում, էջ 230:

հանդերձ, հին շումերական մարտականոքերը շատ հեռու են Հայաստանի ուսումնասիրվող մոդելներից թե՛ ժամանակագրական, թե՛ էոնոստրուկտիվ, թե՛ կառարելության իմաստով:

Հին արևելյան մարտականոքերի հայտնի բոլոր տեսակների մեջ լճաշենի և Լոռի-բերդի մոդելներին շատ մոտ են կանգնած խեթական մարտականոքերը: Անիտտա թագավորի արձանագրությունից հայտնի է, որ դեռևս մ. թ. ա. XIX դարի խեթական բանակում գոյություն ունեւ մարտականոքերի ջոկատ²⁰, իբրև արագաշարժ և հատուկ զորամիավորում: Խեթական մարտականոքերի տիպերը պահպանվել են եգիպտական այն բարձրաքանդակների վրա, որոնք ներկայացնում են զրվագներ մ. թ. ա. 1296 թ. եգիպտա-խեթական պատերազմից, հատկապես խեթական Կադեշ (Սիրիա) ամրոցի համար մղված մարտերից (նկ. 5): Սրանք ունեն վահանաձև և կիսակլոր առաջամաս, բաց ետնամաս, 8 շուղանի երկու անիվներ, զույգ ձիեր: Մարտականոքի թափքին, շնայած նրա փոքր չափերին, տեղավորվել է երեք մարտիկ՝ վարող, նետածիգ ու վահանակիր, որոնք միավորել են արագության, հարձակման ու պաշտպանության ֆունկցիաները²¹:

Կանոնակում, Ամոնի տաճարի վրա պատկերված է վերոհիշյալ պատերազմում խեթերի դեմ հանդես եկող Սեթի I փարավոնը մարտականոք բարձրանալու պահին²²: Այս մարտականոքը մեծ նմանություններ ունի թե՛ խեթականներին և թե՛ մեր մոդելներին: Ըստ եգիպտական տվյալների, խեթերն այս պատերազմում դուրս են բերել 3500, իսկ մեկ ընդհարման ժամանակ՝ 1000 մարտականոք: Անհավանական չէ, որ եգիպտացիներն այս պատերազմում ընդօրինակեին կամ ուղղակի որպես ավար տանեին խեթական թեթև մարտականոքերը: Եգիպտոսի պեղումներից հայտնաբերված խեթական մի մարտականոք (նկ. 6)²³, պատրաստված ամբողջովին փայտից, ուղղակի կրկնում է Հայաստանի մոդելները, այն տարբերությամբ, որ նրա անիվները չորս շուղանի են: Սրանք ավելի թեթև էին, քան ասսուրա-բաբելականը և եգիպտականը, որոնք, ըստ վերականգնված օրինակների, կշռում են 5—10 կիլոգրամ²⁴: Եգիպտոսում հայտնաբերված վերոհիշյալ մարտականոքի տարբեր մասերը պատրաստված են տարբեր տեսակի փայտերից. սոնին՝ լաստենուց, անիվներն ու մյուս մասերը՝ հացենուց, անիվների շրջանակները փաթաթված են կեչու կեղևով: Փայտանյութը եգիպտոս էր բերվում նախարաին (Միտանի) երկրից (ըստ ասորեստանյան արձանագրությունների՝ նաիրի), քանի որ կեչին Վանի շրջանից հարավ չի աճում²⁵: Լճաշենի սայլերն ու մարտականոքերը նույնպես պատրաստված են տարբեր փայտատեսակներից: Օգտագործվել է յուրաքանչյուր մասի համար հարմար փայտանյութ, անիվները պատրաստվել են թեղու փայտից, սոնին և առեղը՝ կաղնու, իսկ ծածկը՝ կարմիր ծառի (տիսի) փայտից²⁶:

20 Н. М. Дьяконов, Предыстория армянского народа, Ереван, 1968, էջ 43:

21 В. Замаровский, Тайны хеттов, М., 1968, էջ 276:

22 «Искусство Древнего Востока», М., 1968, նկ. 136a:

23 В. Замаровский, նշվ. աշխ., էջ 279:


24 նույն տեղում, էջ 298:

25 Б. А. Куфтин, Археологические раскопки в Триалети, էջ 124:

26 В. Паланджян, Деревянные повозки из раскопок у селения Лчашен Севан-

Դիտումը մեջ ընդունված է այն կարծիքը, որ թե՛ խեթերը, թե՛ ասո-
յեանցիները մ. թ. ա. II հազարամյակի II կեսին ձիաբուծությունն ու մար-
տակառքեր պատրաստելը սովորեցին խուրրիներից, բայց այդ արհեստները
կատարելագործեցին և հեղաշրջում մտցրին ռազմարվեստի մեջ²⁷։ Հայտնի է,
որ մարտակառքի մուտքը Նգիպտոս կապվում է հիքսոսների ներթափանցման
հետ (մ. թ. ա. XVII դարի սկիզբ), որոնց մի զգալի մասը կազմում էին խուր-
րիները։

Հաշենի մարտակառքերի մոդելներն ուսումնասիրող հեղինակներից
Հ. Ա. Մարտիրոսյանը, լճաշենյան սալների ու մարտակառքերի ծագման աղ-
բյուրը համարում է, մի կողմից, Առաջավոր Ասիայի անիվավոր փոխադրամի-



Նկ. 6

ջուհները, մյուս կողմից՝ փորձում է գտնել մ. թ. ա. III հազարամյակի մշա-
կույթից բխող դրանց տեղական արմատները²⁸։ Ս. Ա. Նսայանը II հազարամ-
յակի II կեսով թվագրվող այս օրինակների վրա տեսնում է խեթական մշա-
կույթի ազդեցությունը²⁹։ Ուսումնասիրողների մի մասը լճաշենի մարտակառ-
քերը համարում է խուրրիական։ Վ. Իվանովը, օրինակ, դրանք համարում է
միտանիական և կապում այն ցեղերի վերաբնակեցման հետ, որոնք ծանոթ
էին մարտակառքերին³⁰։ Առաջին երկու հեղինակների մոտ բազմաթիվ են գե-
ղարվեստական առարկաների այնպիսի օրինակները, որոնք ապացուցում են,
որ անիվավոր փոխադրամիջոցները բուրրովին էլ նորություն չէին Հայաստա-
նի II հազարամյակի II կեսի համար, այլ ունեին իրենց խոր ավանդույթ-
ները։ Սակայն ինչ վերաբերում է հայտնաբերված մոդելներին, ապա դրանք
իրենց կառուցվածքով իսկապես կապվում են խեթա-խուրրիական աշխար-
հի հետ։

Անկասկած, մեծ էր խեթա-խուրրիական ներգործությունը ձիաբուծու-

ского района Арм. ССР, «Աշխատություններ պետական պատմական լիանդարանի», 1959, № 5, էջ 259։

27 И. М. Дьяконов, նշվ. աշխ., էջ 43; В. Замаровский, նշվ. աշխ., էջ 279։

28 А. А. Мартиросян, նշվ. աշխ., էջ 101։

29 С. А. Есаян, Из истории колесного транспорта древней Армении, «Պատմա-
բանասիրական Դանդես», 1960, № 3, էջ 150։

30 В. Замаровский, նշվ. աշխ., վ. Իվանովի առաջաբանը։

թվան, անիվավոր փոխադրամիջոցների, մարտակառքերի տարածման բնագավառում ամբողջ Արևելքի շափանիշով վերցրած: Ի. Մ. Դյակոնովը ենթադրում է, որ մարտակառքերն ու ձիաբուծությունը Աքայան Հունաստան ներթափանցեցին Փոքր Ասիայից³¹: Հիլրավի, հունական աշխարհի արվեստի գործերում բազմաթիվ են այնպիսի բնորոշ տարրեր, որոնք խոսում են նույնիսկ բավականաչափ զորեղ ներթափանցումների մասին: Այսպես, Միքենի 5-րդ շախտային դամբարանի (մ. թ. ա. XVI դար) սալի վրա քանդակված է թեթև մարտակառք, որի ետնամասի ոլորուն ձողը հիշեցնում է մեր մոդելների ետնամասի օղակավոր ձողը: Մարտիկն իր գոտկատեղին ունի լայնաշեղք դաշույն, ինչպես Հոռի-բերդի մոդելում: Դիտելով էնկոմիի կարասի վրա պատկերված մարտակառքը, երկարադունչ և երկարաբաշ ձիերով, սանձով ու լուծով (մ. թ. ա. XIII դար), չի կարելի չվերհիշել մեր մարտակառքերի առանձին դետալները³²: Իսկ Կարպիից³³ հայտնաբերված սալաձև պոչակը (մ. թ. ա. 1100—1000 թթ.) թափքի ձևով ուղղակի կապվում է Հոռի-բերդի մարտակառքի հետ: Կրետե կղզուց հայտնաբերված մարտակառքի կավե մի մոդելի թափքի ետնամասի ձողը նույնպիսի կառուցվածք և դիրք ունի, ինչպես մեր մարտակառքերը³⁴: Վերջին երեք օրինակները պատկանում են ավելի ուշ ժամանակների, քան հայաստանյան մոդելները և խուրրի-խեթական նրանց նախատիպերը, այդ պատճառով էլ պահպանում և կրկնում են առաջավորասիական բազմաթիվ ավանդական տարրեր:

Պետք է ասել, որ հունական աշխարհի մարտակառքերի կամ սալերի անիվները մեծ մասամբ չորս շուրջանի են: Չորս շուրջանի էր նաև Եգիպտոսում հայտնաբերված խեթական մարտակառքի անիվը, որը, սակայն, իր ետնամասի ձողով չէր նմանվում մեր օրինակին. նրանը կողքից բարձրացող երկար ու բարակ՝ ասորեստանյան տիպի մի ձող էր³⁵: Ուսումնասիրողներն անուղղակի ձևով նշում են, որ չորս շուրջանի անիվներն սկսել են օգտագործվել մ. թ. ա. XVII դարից ոչ ուշ³⁶:

Ինչպես տեսնում ենք, մարտակառքի ձևերը ողջ Առաջավոր Արևելքում փոխանցվում են միմյանց և կրում են անխուսափելի փոխազդեցություններ, սկսած հարավային Միջագետքից մինչև էգեյան աշխարհ, Անդրկովկասից մինչև Եգիպտոս:

Կարթագենում հաստատված փյունիկեցիները, երբ մ. թ. ա. մոտ 1000 թ. ոսկու փոշի, փղոսկր և թանկարժեք փայտատեսակներ ձեռք բերելու նպատակով սալերով ու մարտակառքերով ճանապարհորդում էին Աֆրիկայի խորքերը, իրենց ճանապարհին թողել են դրանց պատկերները՝ ժայռանկարների կամ ժայռափորադրությունների ձևով: Որքան էլ որ տարօրինակ թվա, սրանք շատ նման են մեր մարտակառքերին, իսկ ժ. Մադելը գտնում է, որ նմանվում են հիքսոսների մարտակառքերին³⁷:

³¹ И. М. Дьяконов, *Изд. жур.*, т. 43.

³² Н. А. Сидорова, *Изд. жур.*, т. 210, № 227.

³³ «Эгейское искусство», М., 1972, № 104.

³⁴ F. Studniczka, Der Rennwagen im syrisch-phönikischen Gebiet. „Jahrbuch des Kaiserl. Deutschen Archäologischen Instituts“, XXIII, 1907, Berlin, 1908, т. 167.

³⁵ R. Barnett, W. Forman, *Изд. жур.*, № 15, 26, 27, 142.

³⁶ А. А. Мартиросян, Армения в эпоху бронзы..., т. 100.

³⁷ J. Mazel, Avec les Phéniciens, Paris, 1968, т. 246—250.

Խեթա-խուրիական և Կրետե-միքենյան առնչությունների իմաստով հետաքրքրական է նաև հետևյալ փոքր մանրամասնը: Հոռի-բերդի մարտակառքի վրա կանգնած մարտիկներից մեկը սաղավարտով է, մյուսը՝ ոչ: Սաղավարտն ըստ երևույթին կլոր, թասակաձև է եղել, նրա եզրը գլխի վրա բուրդովին չի նկատվում, սակայն զգացվում է, որ փոքրիկ է, բավական իջած ճակատին: Եթե բուն սաղավարտը քանդակի վրա չի արտահայտված, ապա նրա կատարը, որը չափերով բավական մեծ է, առանձնապես շեշտված է: Սա բարձրանում է ուղղակի գագաթից, լայն փովում և ծայրերում սրանալով՝ իջնում է երկու կողմերում համարյա հավասարաչափ ձևով: Լճաշենի մարտակառքերի ռադիկները նույն սաղավարտն ունեն, աննշան տարբերություններով: Առաջավոր Ասիայի հնագիտական, գեղարվեստական իրերի, բարձրաքանդակների և այլ փաստական նյութերի մեջ միշտ չէ, որ կարելի է հանդիպել նմանօրինակ սաղավարտների: Սրանք, իհարկե, ձևով հիշեցնում են խեթական, վաղ ուրարտական և ասորեստանյան սաղավարտները³⁸, սակայն չեն կարող համանման համարվել: Մեր մոդելի սաղավարտին բավական նման սաղավարտ ունի Մարաշում³⁹ ձեռք բերված գինձորի բրոնզե արձանիկը, մեջքին փոքրիկ դաշույնով, որը հավանաբար խեթ է: Նման սաղավարտներ ունեն այն մարդիկ, որոնք նստած են բրոնզե դեկորատիվ կացնի վրա քանդակված կառքի մեջ (մ. թ. ա. II հազ. վերջ I հազ. սկիզբ), գտնված Սակըղից (Քուրդիստան): Այս կառքին լծված է առյուծ, իսկ կառքի ետևում կանգնած է թևերը բաց մի թռչուն⁴⁰: Մեր օրինակին շատ մոտ սաղավարտներ ունեն Օլիմպոսից հայտնաբերված բրոնզե եռոտանու վրա քանդակված մարդիկ, որոնք բռնել են սալլաձև մի առարկա (մ. թ. ա. VIII դար)⁴¹:

Ինչպես վերևում նշեցինք, մ. թ. ա. III հազարամյակից սկսած, Հայաստանում գոյություն ունեին անիվավոր փոխադրամիջոցների տարածված տիպեր և այդ բնագավառում ձևավորված էին որոշակի կայուն ավանդույթներ: Ի տարբերություն նշված ժամանակաշրջանի, մ. թ. ա. II հազարամյակի II կեսին, Հայաստանի ցեղային ավագանու կենցաղում մեծ տարածում են դրանում ռազմի կառքերը, կամ մարտակառքերը, որոնք չէին տարբերվում Առաջավոր Ասիայի լավագույն, առաջնակարգ տիպերից: Մ. թ. ա. IX դարից սկսած Հայաստանում մեծ տարածում են գտնում ուրարտական մարտակառքերը՝ նախ՝ խեթա-խուրիականը և ապա՝ ասորեստանյան-ուրարտականը Առաջավոր Ասիայի մարտակառքերի հիմնական այն ձևերն էին, որ հետագայում լայնորեն տարածվեցին Իրանական աշխարհում, արևելամիջերկրականի շրջաններում և ապա նաև հունական մայրցամաքում⁴²:

³⁸ С. А. Есаян, Оружие и военное дело древней Армении. Ереван, 1966, էջ 101, տախտ. XVI, նկ. 1, 2, 6, 11:

³⁹ G. Perrot et Ch. Chipiez, Phénicie, Cypre, Paris, էջ 441, նկ. 119, 120:

⁴⁰ J.-L. Huot, Iran, I, Genève—Paris—Munich, 1965, նկ. 86:

⁴¹ «Искусство Древней Греции», նկ. 77б:

⁴² Նման ազդեցություններն ու փոխառնությունները հիմնավորվում են նաև նյութական մշակույթի այլ բնագավառներում գոյություն ունեցող փաստարկներով: Ուսումնասիրողները ցույց են տվել Հայաստանի և Վրաստանի II հազարամյակի I կեսի ինչպես մետաղե, այնպես էլ խեցեղեն իրերի համանմանությունները էգեյան աշխարհի հետ: Մ. թ. ա. XVI դարի էգեյան ծագում ունեցող սուսերներ են հանդիպում Հայաստանի (Ձորագետ, Ղաչաղան) և Վրաստանի դամբարաններում, որոնք անմիտելի ապացույց են փոխանակային կապերի և փոխազդեցության:

Ուրարտական մարտակառքերի ձևով նման են ասորեստանյաններին⁴³, վերջիններս ոչ այնքան թեթև արկղեր են, կողքերին խաչաձևվող կապարճներով: Այստեղ արժե հիշատակել Հասանլուի գավաթի (մ. թ. ա. IX դար) արծաթե դրվագումը⁴⁴, որի վրա պատկերված մարտակառքը ասորեստանյան ոճ ունի՝ իր ծանր թափքի վրա խաչաձևվող կապարճներով, անիվի ձևով ու թռչնի գլխով ավարտվող սոնիով: առեղը բարձր է, ինչպես մեր նյութերում: Հետաքրքրական է աքեմենյան շրջանի (մ. թ. ա. VI—IV դդ.) մարտակառքի մի ոսկե մոդել⁴⁵, որը Ռ. Գիրշմանի կարծիքով բաղադրիչական ծագում ունի: Միայն թափքը ուղղանկյունաձև արկղիկ է, լծված է շորս ձի, վզներին ուղիղ լուծով, առեղը բարձր չէ, անիվներն ունեն ինը շրուղ: Թափքին նստած երկու մարդկանցից մեկը վարում է կառքը ոսկե սանձաթելերի միջոցով, որոնք անցնում են լուծի վրայի օղակներից: Գիրշմանը գտնում է, որ այս տիպը տարածված էր Ուրարտուում և իբրև օրինակ բերում է Մուսասիրի տաճարի մի քանի նվիրատվական մարտակառքեր, ինչպես նաև Ռուսա I-ի մ. թ. ա. VIII դարի բրոնզե մեծ մարտակառքը թագավորի քանդակով, որն իր վրա ուներ սեպագիր արձանագրություն: Մակայն նա գտնում է, որ կառքի վրա եղած երկու մարդիկ, իրենց հագուստով և այլ մանրամասներով, իրանցիներ են:

Սույն ուսումնասիրությունը ցույց է տալիս, որ Լուրի-բերդի մարտակառքը արգասիքն է Հին Արևելքի խառնարանում ծնունդ առած և դարերի ընթացքում ձևավորված, հղկված ու կատարելագործված ձևերի: Այն արտադրանքն է հին քաղաքակիրթ աշխարհի հետ սերտորեն կապված և նրա մի մասնիկը կազմող Հյուսիսային Հայաստանի:

ЛОРИБЕРДСКАЯ КОЛЕСНИЦА ЭПОХИ ПОЗДНЕЙ БРОНЗЫ

С. Г. ДЕВЕДЖЯН

(Резюме)

В 1971 г. в большом каменном ящике (№ 7, XIV—XIII вв. до н. э.) среди предметов погребального инвентаря была найдена бронзовая модель колесницы, сходная с найденными в 50-х годах в погребениях Лчашена. Эти модели не имеют близких аналогов среди известных моделей и являются изделиями местных мастеров.

Из найденных моделей колесниц Древнего Востока они ближе других к хеттским своей щитовидной, полусферической передней частью, изяществом и легкостью кузова. Изображения хеттских боевых колесниц известны по египетским барельефам. Настоящие же деревянные образцы найдены в Египте.

Модели, найденные на территории Армении, своим строением связаны с хетто-хурритским миром, влияние которого в середине II тыс. до н. э. распространялось до греческого материка.

⁴³ Հ. Մարտիրոսյան, Հ. Մնացականյան, Նոր Արեջի ուրարտական կոլումբարին, ՀՍՍՀ ԳԱ «Տեղեկագիր» (հապ. գիտ.), 1958, № 10, էջ 71: С. А. Есаян, Из истории колесного транспорта..., էջ 149—150:

⁴⁴ E. Porada, Alt-Iran, Baden-Baden, 1962, էջ 103:

⁴⁵ R. G. Hirschman, Iran, München, 1964, էջ 248, նկ. 301: